

BH BIL 452 KHAMIS, 4 Oktober 2018

V27

VARSI

BERITA
bhvarsiti@bh.com.my

[FOTO HIASAN]

Universiti sedia kemudahan untuk pelajar bekerja sambilan

Kuala Lumpur: Universiti awam (UA) dan institusi pengajian tinggi (IPT) di negara ini tidak mempunyai halangan sekiranya pelajar ingin melakukan kerja sambilan ketika masih dalam pengajian asalkan dilakukan di luar waktu belajar dan tidak membebaskan pelajar.

Timbalan Naib Canselor (Hal Ehwal Pelajar dan Alumni), Universiti Tenaga Nasional (UNITEN), Prof Datuk Dr Mohd Zamri Yusoff, berkata di UNITEN, pihak pengurusan menyediakan program yang dinamakan UNITEN Students Internship Scheme (USIS) untuk pelajar yang ingin bekerja.

Katanya, matlamat utama program itu adalah untuk menyediakan platform kepada pelajar menimba pengalaman bekerja di dalam kampus ketika masih belajar, selain mendapat sedikit pendapatan tambahan.

Beliau berkata, melalui skim ini, pelajar boleh melakukan kerja sambilan di jabatan yang bersesuaian di UNITEN.

"Bagi pelajar yang bekerja di dalam kampus melalui program USIS, jumlah jam bekerja maksimum yang boleh dijalankan ialah 20 jam seminggu dan hanya pelajar yang mempunyai CGPA tidak kurang daripada 2.5, layak memohon untuk mengikuti program USIS," katanya.

Bagi pelajar yang terpaksa bekerja kerana mempunyai masalah kewangan, Prof Mohd Zamri berkata, UNITEN menyediakan bantuan melalui Tabung Amanah Zakat UNITEN (TAZU) dan Yayasan Canselor UNITEN (YCU).

"TAZU menyediakan bantuan untuk menampung tambahan bayaran yuran pengajian, penginapan dan sara hidup bagi pelajar golongan asnaf



Pelbagai kerja sambilan dilakukan pelajar untuk mencari pendapatan sampingan sekali gus meringankan beban keluarga.

manakala YCU menyediakan dermasiswa kepada pelajar daripada keluarga kurang berkemampuan.

"Selain daripada itu, Pusat Hal Ehwal Pelajar juga memberikan bantuan melalui Tabung Kebajikan Pelajar kepada pelajar yang ditimpa musibah," katanya.

Ikut garis panduan

Sementara itu, Naib Canselor Universiti Putra Malaysia (UPM), Prof Datin Paduka Dr Aini Ideris, berkata pihak universiti tidak menghalang pelajar untuk melakukan kerja sambilan bagi meringankan beban kos sara hidup dan keadaan ekonomi yang amat mencabar masa kini.

Meskipun begitu, katanya, pihak universiti lebih menggalakkan pelajar melaksana-



Prof Mohd Zamri

kan kerja sambilan di dalam kampus berbanding di luar kampus kerana isu keselamatan dan mungkin terdedah kepada perkara yang tidak diinginkan.

"Kerja dalam kampus adalah lebih terkawal dan selamat. Pihak universiti menyediakan pelbagai inisiatif di dalam kampus seperti Program Khidmat Pelajar dan Program Keusahawanan Siswa.

"Pihak universiti mempunyai garis panduan bagi pelajar tempatan yang berkerja sambilan di dalam kampus seperti tempoh masa berkerja iaitu 100 jam sebulan pada sesi pengajian dan 160 jam sebulan pada cuti semester dengan kadar bayaran RM6 hingga RM7 satu jam, manakala bagi pelajar antarabangsa mereka

terikat dengan kelulusan visa mereka," katanya.

Pengarah Keusahawanan dan Kerjaya Universiti Malaysia Terengganu (UMT), Dr Shaari Abd Rahman, berkata universiti menyediakan platform untuk pelajar bekerja sambilan melalui program yang dikenali dengan nama UMT Crew.

"UMT Crew ditubuhkan pada Mac tahun lalu bagi mengumpulkan pelajar yang berminat untuk mendapatkan kerja sambilan dan kini sudah mempunyai 698 ahli yang mendaftar.

"Platform ini menyediakan akses kepada pelajar mengenai kerja sambilan yang ada di dalam dan luar kampus dan kini kira-kira 800 kerja sambilan tersedia melalui saluran UMT Crew," katanya.

Budaya kerja orang Jepun wajar jadi contoh

← Dari V25

"Kerja sambilan ini juga memberi peluang kepada saya untuk mencari pengalaman sekali gus belajar untuk berkomunikasi dalam bahasa Jepun apabila berdepan dengan pelanggan yang kebanyakan terdiri daripada rakyat tempatan," katanya.

Pelajar tahun empat itu sudah bekerja sambilan selama satu setengah tahun, bermula sejak Jun tahun lalu.

Amir Fakhry berkata, gajinya dikira setiap jam dan biasanya bayaran berbeza mengikut lokasi tempat bekerja.

"Bagi saya yang bekerja di Tokyo, dibayar kira-kira RM37 (¥1000) setiap jam. Saya bekerja selama 10 jam setiap minggu, jadi keseluruhannya ialah 40 jam setiap bulan yang memberikan saya lebih kurang RM1,463.79 (¥40000) setiap bulan.

"Saya tidak pernah kerja

sambilan sebelum ini, tetapi saya dapat katakan kerja sambilan di Jepun lebih mencabar berbanding di Malaysia," katanya.

Mengisi masa lapang

Beliau berkata, gaji yang ditawarkan mungkin mahal empat kali ganda, tetapi kerja juga empat kali ganda susah kerana pekerjaan tidak boleh menggunakan telefon bimbit langsung dan setiap saat bekerja ialah milik syarikat.

"Pekerja perlu akur dengan arahan pengurus, pergerakan kena laju dan berdiskari dalam memikirkan apa kerja yang patut dilakukan jika tugasan yang diberikan sudah siap.

"Jika pekerja tidak menepati standard yang ditetapkan, mereka akan dipecat pada bulan ketiga dan begitulah disiplin yang ditunjukkan oleh masyarakat Jepun dalam bekerja dan boleh dijadikan contoh untuk kita rakyat

Malaysia," katanya.

Sementara itu, pelajar Ijazah Sarjana Muda Elektronik dan Pengkomputeran di Takushoku University, Tokyo, Jepun, Faridathul Amera Razali, berkata beliau memilih untuk bekerja sambilan kerana mahu mencari pengalaman kerja, selain mengisi masa lapang selepas selesai sesi kuliah.

Katanya, beliau mula bekerja sambilan sejak Ogos tahun lalu kerana tidak mahu meniadakan masa lapang yang ada sekali gus mendapatkan pengalaman bekerja dengan rakyat Jepun yang mana budaya kerjanya sangat disegani di seluruh dunia.

"Saya memilih untuk bekerja sambilan dengan satu syarikat yang memerlukan saya untuk melakukan tugas inventori, termasuklah mengira stok barang menggunakan mesin yang dikhaskan untuk kedai atau pasar raya seperti Daiso, Uniqlo dan Don Quijote.

"Purata masa jam kerja saya ialah 14 jam seminggu dan gaji diberikan ialah RM37 (¥1000) untuk setiap jam," katanya.

Tunaikan solat

Faridathul Amera berkata, antara cabaran yang dihadapi sepanjang bekerja adalah penerimaan majikan mengenai pemakaian tudung dan pelepasan waktu untuk menunaikan solat.

"Selepas memberikan penjelasan mengenai Islam (pemakaian tudung dan kewajipan solat khususnya), tidak lagi timbul masalah malah pihak syarikat dan staf Jepun menerima saya dengan baik serta hormat akan tuntutan agama Islam.

"Bagi pelajar yang ingin bekerja sambilan, pastikan waktu belajar dan waktu kerja haruslah sentiasa seimbang serta dapatkan rehat secukupnya. Tumpuan lebih perlu diberikan pada pelajar-

ran kerana matlamat utama ke negara orang adalah untuk belajar," katanya.

Pelajar Toyo University, Izwan Muayyad Muhammad Mohd Kamil, memilih bekerja sambilan untuk mengisi masa lapang ketika cuti musim panas yang lalu, selain mencari pengalaman bekerja dengan masyarakat Jepun supaya lebih memahami etika dan peraturan bekerja sambilan di negara matahari terbit itu.

"Saya bekerja sambilan sejak Ogos lalu dan tugas saya adalah untuk mengira stok di kedai ataupun gudang seperti Uniqlo dan Amazon dengan anggaran pendapatan saya setiap bulan ialah RM1,500-RM2,000.

"Antara cabaran bekerja sambilan di sini adalah ketika ingin mencari tempat dan masa untuk solat. Selain itu, disebabkan perbezaan bahasa dan budaya, sukar untuk saya bergaul dengan pekerja Jepun," katanya.



Amir Fakhry



Faridathul Amera